

A sisse que...

(D'après Jacques Prévert, poète de notre adolescence)

Sisse què cazemènte
Sisse què rèndjamènte
Sisse què débélavàn...
Y an medzé la pomma è vardó la sèi
Sisse què i tseuyon
Sisse què i megnadzon
Sisse què y éntreñcon
Sisse què y émpondon
Sisse què i moutron avoué lo dèi
Sisse què y an lo rie dèré lè dé
È lè légreemme ou saquet
Sisse què i chè tróson la téta
È chè cayon a la rètse
Sisse què chè lètson catro dèi è lo poudzo
Sisse què y an pó fret i pi
È lè beutton tcheu lè dzor dézò la tóbla
Sisse què i medzon a bouillardón
Sisse què i tréon jamé lo tsapé
Ma ch'achéton su lo tsapé di-z-ótre
Sisse què i dormon a bétseé
Sisse què lleu fó bée ou bouillet
Sisse què lleu fó bèzé babouinna
Sisse què i mordon ou métèn di corne di boc
Sisse que i tsertson lè pioù permé la paille
Sisse què y an lo bât dézò la panse
Sisse què i van commèn lo bou ou tsan
Sisse què y an pó dè demàn
Sisse que y an pó dè perdón
Sisse què y an lo peutro plèn
Sisse què y an lo magón
Sisse què porton dè pèdze
Sisse què « sè i plou pó, i gotte »
Sisse què : « n'a 'co mé dè dzor dèré lè bèque »
Sisse què y an lè pèi dret è lè bouigno plan
Sisse què lleu manque dézeneu pè fae veun

Sisse què : « travaillèye coui y a fan »
Sisse què i dion : « Dè vouèi èn vouet... »
È chè fan pó vére dè sét èn cattro
Sisse què y aiton la leunna
È chè nanton lè fiolle
Sisse què tè sopaton lè pudze
È tè ronton lè bale
Sisse què i clléon dè nét
Sisse qu'i dormón dè dret
Sisse qu'i trin-on lè soque
Sisse què y an tedzor la fèi
Sisse què y oulon lo seu è la meutse
Sissè què i van èn cosset
Sisse qu'i van pó èn gneun sèn
Sisse què i san pó ioi qu'i van
Sisse què y an pó èncontró feu d'arma
Sisse què d'én plézì nèn fan dó
Sisse què y an lo savèi dèrè l'onglla
Sisse qu'i son ou caro dè la pertse
Sisse què i trouon pó lo tsavón
Sisse què y an perdù la coutría
Sisse què i mouïton dè pecongria
Sisse què i tsaplón tri
Sisse què i pitton fén
Sisse què i prèdzon pròì
Sisse què « pan prétó, pan rèndù... »
Sisse què, sè bon respè, medzon pó pè pó caccà
Sisse qu'i van pó ni a tsassé ni a min-à
Sisse què i tsandzon lè jouè pè la coa
Sisse què chè mordon la lènva
Sisse què la lènva la tégnon ou tsôt
Sisse què i crègnon pó ni vèn ni bize
Sisse què chè beutton èn téta
Sisse què i n'an plèn lo cu
Sisse qu'i son cu è tsemize
Sisse què i comandon a tcheut
È sisse què i crèyon a gnén.
A totta l'umanitó
Trista gréndze dolènta
Mófiènta querioiza èntreganda
Eumbla pachènta coadjoiza

*Guèya allavia contènta
Tan de souè dè Bon-e Fête
Tan dè souè pè l'an nové
É a teu èn particuillé,
Ami dè tedzor,
An soleillà dè bon té,
Én rèyòn dè boneur.*

É gramassì dou fon dou queur

Sebiolla Tsullapróver